

յանձնարարել է ինձ խնդրելու ձերդ գերազանցութեան՝ հաղորդել ինձ, այս օրւայ երեկոյեան ժամը 8-ից սկսած, 72 ժամւայ ընթացքում, ընդունում է արդեօք հանրապետութեան կառավարութիւնը օսմանեան առաջարկութիւններն իրենց բովանդակ ծաւալով:

Ես պէտք է աւելացնեմ նաև, որ այդ երեք օրւայ ընթացքում յարաբերութիւնները մեր երկու կառավարութիւնների միջև կարող են պահել բարեկամական բնոյթ, ա՛յն անառարկելի պայմանով, որ թիւրք զօրքերի գործողութիւնները Կովկասի հարաւում որևէ դիմադրութեան չհանդիպեն: Ընդունեցէք և այլն. Խալիլ»:

«Սահմանային սրբազրութիւն» կոչւածը հողային նոր պահանջ էր. թիւրքերն այժմ պահանջում էին Նախիջևանի ու Ախալցխայի դաւառները, անշուշտ, ազրբէջանցիների բացայայտ թելադրանքով:

Իսկ ի՞նչ էր կատարւում այդ միջոցին Թիֆլիսում:

Նոյն օրը, մայիս 26-ին, գումարւեց Սէյմի վերջին, ողբերգական նիստը, որի մէջ վրաց սոցիալ-դեմոկրատ կուսակցութեան պարագլուխներից Ի. Ծերեթելին արաւ հետեւեալ յայտարարութիւնը.

«Վրաց ժողովուրդը մնացել է մենակ. նրանից անջատւել են հայերը և կամովին թուրքերը: Անդրկովկասի կեղծ անկախութիւնը խանդարում է նրան վարւելու ազատօրէն և իր լիազօր ուժերը գործադրելու իր անկախութիւնը պաշտպանելու համար:

Այս հանգամանքներում մեր պարտքն է ասել վրաց ժողովուրդին. — Դու մնացել ես մենակ, չունես պետական կազմ, չունես քո պատւիրակութիւնը և, որքան էլ ծանր լինի խոստովանել, դու ապրում ես պատրանքներով. չկա՛ն նրանք, չկա՛յ Անդրկովկասի միութիւնը և, ուրեմն, եթէ ուզում ես փրկել քեզ, պաշտպանել քո շահերը, ինչպէս և քո հարեւանների շահերը, պէտք է ունենաս քո ինքնուրոյն պետական կազմը:

... Դժբախտաբար, գոյութիւն չունի այլևս անդրկովկասեան միութիւնը և փաստօրէն չկա՛յ մի ընդհանուր ներկայացուցչական կենտրոնական մարմին, ուստի Սէյմը պէտք է յայտարարէ, թէ ինքը հրաժարւում է իր վրա դրած լիազօրութիւններից ու ցրւի»:

Նախընթաց դէպքերի ուշադիր հետեւողը կը տեսնէ առանց դժւարութեան, թէ Ծերեթելի յայտարարութիւնը սկզբից մինչև վերջ մտացածին փաստերի վրա է հիմնւած. ո՛չ հայերն էին «անջատւել» վրացիներից և ո՛չ էլ վրացի ժողովուրդը մնացել էր մենակ: Անդրկովկասի անկախութեան «կեղծութիւնը» կամ միութեան գոյութիւն չունենալը նոր երևոյթ չէր. նա նոյնն էր, ինչ որ և անկախութեան սկզբում: «Կեղծը» Ծերեթելի մտայնութիւնն էր, այսինքն՝ վրաց վարիչ շրջանների մտայնութիւնը: Նրանք որոշել էին դուրս գալ Անդրկովկասեան միութիւնից և պատրւակ էին փնտռում՝ իրենց տգեղ վարմունքը արտաքին աշխարհի աչքին արդարացնելու համար:

Վրացիների պնդումի վրա Սէյմը ընդունեց մի բանաձև, որը ասում էր. «Ի նկատի ունենալով, որ պատերազմի և խաղաղութեան խնդրում երևան եկան հիմնական տարակարծութիւններ Անդրկովկասի անկախ հանրապետութիւնը կազմող ազգերի միջև, որով անհնար է դառնում ամբողջ Անդրկովկասի համար մի հեղինակաւոր իշխանութեան գոյութիւնը, Սէյմը արձանագրում է Անդրկովկասի քայքայման փաստը և յայտարարում չեղեալ իր լիազօրութիւնները»: